



志第十六

金史三十五

開禧同言在國錄軍國書中書右丞相監修國史領

經筵事都總裁臣

脫脫 奉

勅修

禮八

宣聖廟
祈祭

武成王廟
拜天

前代帝王
本國拜儀

諸神雜祠

宣聖廟皇統元年二月戊午熙宗詣文宣王廟奠祭北面
再拜顧儒臣曰為善不可不勉孔子雖無位以其道可尊
使萬世高仰如此大定十四年國子監言歲春秋仲月上
丁日釋奠於文宣王用本監官房錢六十貫止造茶食等
物以大小楮排設用留守司樂以樂工為禮生率倉場等
官陪位於古禮未合也伏觀國家承平日久典章文物當

粲然備具以光萬世况京師為首善之地四方之所觀仰
據釋奠器物行禮次序合行下詳定兼充國公親承聖教
者也鄒國公力扶聖教者也當於宣聖像左右列之今孟
子以燕服在後堂宣聖像側還虛一位禮宜遷孟子像於
宣聖右與顏子相對改塑冠冕粧飾法服一尊舊制禮官
參酌唐開元禮定擬釋奠儀數文宣王充國公鄒國公每
位籩豆各十犧尊一象尊一簠簋各二俎二祝板各一皆
設案七十二賢二十一先儒每位各籩一豆一爵一兩廡
各設象尊二總用籩豆各一百二十三簠簋各六俎六犧
尊三象尊七爵九十四其尊皆有坫壘二洗二篚勺各二

樂六正位并從祀藉罇壘俎豆席約用三十幅尊席用葦
俎豆席用莞牲用羊豕各三酒二十瓶禮行三獻以祭酒
司業博士充分奠官二讀祝官一太官令一捧祝官二壘
洗官一爵洗官一巾篚官二禮直官十一學生以儒服陪
位樂用登歌大樂令一負本署官充樂工三十九人迎神
三奏姑洗宮來寧之曲辭曰上都隆化廟堂作新神之來
格威儀具陳穆穆凝旒巍然聖真斯文伊始群方所視初
獻盥洗姑洗宮靜寧之曲辭曰偉矣素王風猷至粹垂二
千年斯文不墜洎辰維良爰修祀事沃盥于庭嚴禋禮備
升階南呂官肅寧之曲辭曰巍乎聖師道全德隆修明五

常垂教無窮增崇儒宮道追遺風嚴祀申虔登降有容奠幣姑洗宮和寧之曲辭曰天生聖人賢於堯舜仰之彌高磨而不磷新廟告成宮牆數仞遣使陳祠斯文復振降階姑洗宮安寧之曲辭曰稟靈尼丘垂芳闕里生民以來孰如夫子新祠巋然四方所視酌觴告成祇循典禮充國公酌獻姑洗宮輯寧之曲辭曰聖師之門顏惟居上其殆庶幾是宜配饗桓圭袞衣有嚴儀象載之神祠增光吾黨鄒國公酌獻姑洗宮泰寧之曲辭曰有周之衰王綱既墜是生真儒宏才命世言而為經醇乎仁義力扶聖功同垂萬祀亞終獻姑洗宮咸寧之曲辭曰於昭聖能與天立極有

承其流皇仁帝德豈伊立言訓經王國煥我文明典祀十億送神姑洗宮來寧之曲辭曰吉蠲為饗孔惠孔時正辭嘉言神之格思是饗是宜神保聿歸惟時肇祀太平極致承安二年春丁章宗親祀以親王攝亞終獻皇族陪祀文武羣臣助奠上親為贊文舊封公者升為國公侯者為國侯邠伯以下皆封侯宣宗遷汴建廟會朝門內歲祀如儀宣聖顏孟各羊一豕一餘同小祀共用羊八無豕其諸州釋奠並遵唐儀

武成王廟泰和六年詔建昭烈武成王廟于闕庭之右麗澤門內其制一遵唐舊禮三獻官以四品官已下儀同中

祀用二月上戊七年完顏匡等言我朝創業功臣禮宜配祀於是以前秦王宗翰同子房配武成王而降管仲已下又躋楚王宗雄宗望宗弼等侍武成王坐韓信而下降立於庶又黜王猛慕容恪等二十餘人而增金臣遼王賽也等其祭武成王宗翰子房各羊一豕一餘共用羊八無豕宣宗遷汴於會朝門內闕庭之右營廟如制春秋上戊之祭仍舊

諸前代帝王三年一祭於仲春之月祭伏羲於陳州神農於亳州軒轅於坊州少昊於兗州顓頊於開州高辛於歸德府陶唐於平陽府虞舜夏禹成湯於河中府周文王武王於京兆府泰和三年尚書省奏太常寺言開元禮祭帝嚳堯舜禹湯文武漢祖祝板請御署開寶禮犧軒顓頊帝嚳陶唐女媧成湯文武請御署自漢高祖以下二十七帝不署平章政事鎰左丞匡太常博士溫迪罕天興言方嶽之神各有所主有國所賴請御署固宜至于前古帝王寥落杳茫列于中祀亦已厚矣不須御署參知政事即康及鉉以爲三皇五帝禹湯文武皆垂世立教之君唐宋致祭皆御署而今降祝板不署恐於禮未盡不若止從外路祭社稷及釋奠文宣王例不降祝板而令學士院定撰祝文頒各處爲常制勅命依期降祝板而不請署

長白山大定十二年有司言長白山在興王之地禮合尊
崇議封爵建廟宇十二月禮部太常學士院奏奉勅旨封
興國靈應王即其山北地建廟宇十五年三月奏定封冊
儀物冠九旒服九章圭玉冊函香幣冊祝遣使副各一
員詣會寧府行禮官散齋二日致齋一日所司於廟中陳
設如儀廟門外設玉冊衮冕幄次牙杖旗鼓從物等視一
品儀禮用三獻如祭嶽鎮其冊文云皇帝若曰自兩儀剖
判山嶽神秀各鍾于其分野國將興者天實作之對越神
休必以祀事故肇基王迹有若岐陽望秩山川於稽虞典
厥惟長白載我金德仰止其高實惟我舊邦之鎮澗同流

光源所從出秩秩幽幽有相之道列聖蕃衍熾昌迄于太
祖神武徵應無敵于天下爰作神主肆予冲人紹休聖緒
四海之內名山大川靡不成秩矧王業所因瞻彼旱麓可
儉其禮服章爵號非位於公侯之上不足以稱焉今遣某
官某持節備物冊命茲山之神爲興國靈應王仍勅有司
歲時奉祀於戲廟食之享亘萬億年維金之禎與山無極
豈不偉歟自是每歲降香命有司春秋二仲擇日致祭明
昌四年十月備衮冕玉冊儀物上御大安殿用黃麾立仗
八百人行仗五百人復冊爲開天弘聖帝
大房山大定二十一年勅封山陵地大房山神爲保陵公

冕八旒服七章圭冊香幣使副持節行禮並如冊長白山之儀其冊文云皇帝若曰古之建邦設都必有名山大川以爲形勝我國既定鼎於燕西顧郊圻巍然大房秀拔混厚雲雨之所出萬民之所瞻祖宗陵寢於是焉依仰惟嶽鎮古有秩序皆載祀典矧茲大房禮可闕歟其爵號服章俾列于侯伯之上庶足以稱今遣某官某備物冊命神爲保陵公申勅有司歲時奉祀其封域之內禁無得樵採弋獵者爲令是後遣使山陵行禮畢山陵官以一獻禮致奠混同江大定二十五年有司言昔太祖征遼策馬徑渡江神助順靈應昭著宜修祠宇加賜封爵廼封神爲興國應

聖公致祭如長白山儀冊禮如保陵公故事其冊文云昔我太祖武元皇帝受天明命掃遼季荒蕪成師以出至于大江浩浩洪流不舟而濟雖穆滿渡江而鼉梁光武濟河而水冰自今觀之無足言矣執徐之歲四月孟夏朕時邁禘邦臨江永歎仰藝祖之開基佳江神之効靈至止上都議所以尊崇之典蓋古者五嶽視三公四瀆視諸侯至有唐以來遂享帝王之尊稱非直後世彌文而崇德報功理亦有當然者矧茲江源出於長白經營帝鄉實相興運非錫以上公之號則無以昭荅神休今遣某官某持節備物冊命神爲興國應聖公申命有司歲時奉祀於戲嚴廟貌

正封爵禮亦至矣惟神其衍靈長之德用輔我國家彌億年神亦享廟食於無窮豈不休哉

嘉蔭侯大定二十五年勅封上京護國林神爲護國嘉蔭侯毳冕七旒服五章圭同信圭遣使詣廟以三獻禮祭告其祝文曰蔚彼長林實壯天邑廣袤百里惟神主之廟貌有嚴侯封是享歆時蠲潔相斲滋榮是後遇月七日上京幕官一負行香著爲令

灑溝河神大定十九年有司言灑溝河水勢泛決嚙民田之官爲封冊神號禮官以祀典所不載難之已而特封安平侯建廟二十七年奉旨每歲委本縣長官春秋致祭如

令

昭應順濟聖后大定十七年都水監言陽武上埽黃河神聖后廟宜依唐仲春祭五龍祠故事二十七年春正月尚書省言鄭州河陰縣聖后廟前代河水爲患屢禱有應嘗加封號廟額今因禱祈河遂安流乞加褒贈上從其請特加號曰昭應順濟聖后廟曰靈德善利之廟每歲委本縣長官春秋致祭如令

鎮安公舊名旺國崖太祖伐遼嘗駐蹕於此大定八年五月更名靜寧山後建廟明昌六年八月以冕服玉冊冊山神爲鎮安公冊文曰皇帝若曰古之名山咸在祀與軒皇

之世神靈所奉者七千虞氏之時望秩每及於五載蓋惟
有益于國是以必報其功逮乎後王申以徽冊至于嶽鎮
之外亦或封爵之加故太白有神應之稱而終南有廣惠
之號禮由義起事與時偕載藉所傳于今猶監朕修和有
夏咸秩無文眷茲靜寧秀峙朔野緼澤布氣幽贊乎坤元
導風出雲協符乎乾造一方之表萬物所瞻南直都畿北
維障徼連延廣厚寶箴攸興盤固高明謨宮斯奠昔有遼
嘗恃以富國迄大定更爲之錫名洪惟世宗功昭列聖亦
越顯考德利生民爰即歲時駕言臨幸兵革不試遠人輯
寧雨暘常調品彙蕃庶此上帝無疆之貺亦英靈有相之

符比即輿情載修故事顧先皇帝駐蹕之地揖累世承平
之風迺續遺休式甄神祐肆象德以畀號仍班台而闡儀
宇像一新采章具舉今遣使某副某持節備物冊命神爲
鎮安公仍勅歲時奉祀於戲容典焜耀精明感通惟永億
年翊我昌運神其受職豈不偉歟

瑞聖公即麻達葛山也章宗生於此世宗愛此山勢衍氣
清故命章宗名之後更名胡土白山建廟明昌四年八月
以冕服玉冊封山神爲瑞聖公建廟命撫州有司春秋二
仲擇日致祭爲常其冊文曰皇帝若曰國家之興命曆
屬天地元化惟時合符山川百神無不受職粹精薦瑞明

聖繼生著丕應於殊禎啓昌期於幽贊哀對信猶之典威
修望秩之文嘉乃名山莫茲勝地下綿乾分上直樞輝盤
析木之津達中原之氣廓除氛祲函毓泰和仰惟光烈昭
垂徽音如在即高明而清暑克靜壽以安仁周廬安寧厚
澤浹洽朕祗循祖武順講時巡感美號以興懷佩聖謨而
介福言念誕彌之初度抑由翊衛之效靈然猶祀秩無章
神居不屋非所以盡報功崇德之義副追始樂原之心爰
飾名稱載新祠宇勒忱辭於貞琰消良日於元龜彰服采
以辨威潔履縣而致祭闡揚茂實敷繹多儀今遣使其副
某持節備物冊命神爲瑞聖公仍勅有司歲時奉祀於戲
尚其聰明歆此誠意孚休懋永亦莫不寧

貞獻郡王廟明昌五年正月陳言者謂葉魯谷神二賢創
製女直文字乞各封贈名爵建立祠廟令女直漢人諸生
隨拜孔子之後拜之有司謂葉魯難以致祭若金源郡貞
獻王谷神則既已配享太廟矣亦難特立廟也有旨令再
議之禮官言前代無創製文字入孔子廟故事如於廟後
或左右置祠令諸儒就拜亦無害也尚書省謂若如此恐
不副國家厚功臣之意遂詔令依蒼頡立廟于盤屋例官
爲立廟于上京納里渾莊委本路官一員與本千戶春秋
致祭所用諸物從宜給之

祈禱大定四年五月不雨命禮部尚書王競祈雨北嶽以
定州長貳官充亞終獻又卜日於都門北郊望祀嶽鎮海
瀆有司行事禮用酒脯醢後七日不雨祈太社太稷又七
日祈宗廟不雨仍從嶽鎮海瀆如初祈其設神座實樽壘
如常儀其樽壘用瓢齊擇甘瓠去抵以爲尊祝板惟五岳
宗廟社稷御署餘則否後十日不雨乃徙市禁屠殺斷織
扇造土龍以祈雨足則報祀送龍水中十七年夏六月京
畿久雨遵祈雨儀命諸寺觀啓道場祈禱

拜天金因遼舊俗以重五中元重九日行拜天之禮重五
於鞠場中元於內殿重九於都城外其制刻木爲盤如舟

狀赤爲質畫雲鶴文爲架高五六尺置盤其上薦食物其
中聚宗族拜之若至尊則於常武殿築臺爲拜天所重五
日質明陳設畢百官班俟於毬場樂亭南皇帝靴袍乘輦
宣徽使前導自毬場南門入至拜天臺降輦至褥位皇太
子以下百官皆詣褥位宣徽贊拜皇帝再拜上香又再拜
排食拋盞畢又再拜飲福酒跪飲畢又再拜百官陪拜引
皇太子以下先出皆如前導引皇帝回輦至幄次更衣行
射柳擊毬之戲亦遼俗也金因尚之凡重五日拜天禮畢
插柳毬場爲兩行當射者以尊卑序各以帕識其枝去地
約數寸削其皮而白之先以一人馳馬前導後馳馬以無

羽橫鏃箭射之既斷柳又以手接而馳去者爲上斷而不能接去者次之或斷其青處及中而不能斷與不能中者爲負每射必伐鼓以助其氣已而擊毬各乘所常習馬持鞠杖杖長數尺其端如偃月分其衆爲兩隊共爭擊一球先於毬場南立雙桓置板下開一孔爲門而加網爲囊能奪得鞠擊入網囊者爲勝或曰兩端對立二門互相排擊各以出門爲勝毬狀小如拳以輕韌木枵其中而朱之皆所以習躡捷也既畢賜宴歲以爲常

本國拜儀金之拜制先袖手微俯身稍復却跪左膝左右搖肘若舞蹈狀九跪搖袖下拂膝上則至左右肩者凡四如此者四跪復以手按右膝單跪左膝而成禮國言搖手而拜謂之撒速承安五年五月上諭旨有司曰女直漢人拜數可以相從者酌中議之禮官奏曰周官九拜一曰稽首拜中至重臣拜君之禮也乞自今凡公服則用漢拜若便服則各用本俗之拜主事陳松曰本朝拜禮其來久矣乃便服之拜也可令公服則朝拜便服則從本朝拜平章政事張萬公謂拜禮各便所習不須改也司空完顏襄曰今諸人衽髮皆從本朝之制宜從本朝拜禮松言是也上乃命公裳則朝拜諸色人便服則皆用本朝拜

志第十六

志第十七

金史三十六

開儀言上在門外曰言前書右丞相穆國史領經筵事都總裁臣脫脫奉

勅修

禮九

國初即位儀朝參常朝儀

受尊號儀肆赦儀

上壽儀臣下拜詔儀

國初即位儀收國元年春正月壬申朔諸路官民耆老畢
會議創新儀奉上即皇帝位阿离合懣宗翰乃陳耕具九
祝以闢土養民之意復以良馬九隊隊九疋別為色并介
冑弓矢矛劍奉上國號大金建元收國天會元年九月六
日皇弟諳板孛極烈即皇帝位己未告祀天地丙寅大赦
改元

受尊號儀皇統元年正月二日太師宗幹率百僚上表請
上皇帝尊號凡三請詔允七日遣上京留守奭告天地社
稷析津尹宗強告太廟十日帝服袞冕御元和殿宗幹率
百僚恭奉冊禮冊文云云臣等謹奉玉冊玉寶上尊號曰
崇天體道欽明文武聖德皇帝是日皇帝改服通天冠宴
二品以上官及高麗夏國使十二日恭謝祖廟還御宣和
門大赦改元大定七年恭上皇帝尊號前三日遣使奏告
天地宗廟社稷前二日諸司停奏刑罰文字百官習儀於
大安殿庭兵部帥其屬設黃麾仗於大安殿門之内外宣
徽院帥儀鸞司於前一日設受冊寶壇於大安殿中間又

設御榻於壇上又設冊寶幄次於大安殿門外及設皇太
子幕次於殿東廊又設群官次于大安門外大樂令與協
律郎前一日設宮縣于殿庭又設登歌樂架于殿上立舞
表于殿下符寶郎其日俟文武羣官入奉八寶置于御座
左右候上冊寶訖復昇寶還所司其日質明奉冊太尉奉
寶司徒讀冊中書令讀寶侍中以次應行事官並集於尚
書省俟冊寶興乘馬奉迎冊寶至應天門下馬由正門步
導入至大安殿門外置冊寶於幄次昇冊寶床弩手人等
分立於左右文武羣官並朝服入次攝太常卿與大樂令
帥工人入就位協律郎各就舉麾位昇冊寶案官由西偏

門先入置案於殿東西間褥位置訖各退于西階冊寶位後捧冊官捧寶官昇冊匣官昇寶蓋官由西偏門先入至殿西階下冊寶褥位之西東向立俟閣門報通事舍人引攝侍中版奏中嚴訖典儀贊者各就位閣門官引文武百僚分左右入於殿階下塲道之東西相向立符寶郎奉八寶由西偏門分入升置殿上東西間相向訖分左右立於寶後通事舍人引攝侍中版奏外辦扇合服袞冕以出曲直華蓋侍衛警蹕如常儀殿上鳴鞭訖殿下亦鳴鞭初索扇協律郎跪俛伏興舉麾工鼓祝奏乾寧之曲出自東房卽座儀使副添香爐煙升扇開簾捲協律郎偃麾受敵樂

止太常博士通事舍人自冊寶帷次分引冊大常卿前導吏部侍郎押冊而行奉冊太尉讀冊中書令舉冊官於冊後以次從之次太常博士通事舍人二員分引寶禮部侍郎押寶而行奉寶司徒讀寶侍中舉寶官於寶後以次從之由正門入宮縣奏歸美揚功之曲太常卿於冊床前導至第一墀香案南藉冊寶褥位上少置太常卿與舉冊寶官退於冊寶稍西東向立應博士舍人立於其後昇冊寶床弩手繖子官等又於其後皆東向太尉司徒中書令侍中皆於冊後面北以次立吏部侍郎禮部侍郎次立於其後立定樂止閣門舍人分引東西兩班群官合班轉北向

立中間少留班路俟立定太常博士通事舍人四員分引
太尉司徒中書令侍中吏部禮部侍郎以次各復本班訖
博士舍人退以俟初引時樂奏歸美揚功之曲至位立定
樂止典儀曰拜贊者承傳太尉以下應在位官皆舞蹈五
拜班首出班起居訖又贊再拜如朝會常儀太常博士通
事舍人四員再引太尉司徒中書令侍中吏禮部侍郎復
進至冊寶所稍南立定昇冊寶床弩手繖子官並進前舉
冊寶床與太常博士通事舍人二員分引冊太常卿前導
吏部侍郎押冊而行奉冊太尉讀冊中書令舉冊官於冊
後以次從之冊初行樂奏肅寧之曲次通事舍人太常博

士又二員分引寶禮部侍郎押寶而行奉寶司徒讀寶待

中舉寶官於寶後以次從之詣西階下至冊寶褥位少置

冊北樂止昇冊寶床弩手繖子官等退於後稍西東向立

捧冊官與昇冊官並進前取冊匣升太常博士通事舍人

分引冊太常卿側身導冊先升奉冊太尉讀冊中書令舉

冊官捧冊官於冊後以次從升冊初行樂奏肅寧之曲進

至殿上博士舍人分左右於前楹立以俟讀冊中書令於

欄子外前楹稍西立以俟舉冊官捧冊官立於其後奉冊

太尉從升至褥位搢笏少前跪置訖執笏俛伏興樂止退

於前楹稍西立以俟太常博士立於後太常卿少退東向

立昇冊官立於其後皆東向捧冊官先入舉冊官次入讀冊中書令又次入捧冊官四負皆搯笏雙跪捧舉冊官二負亦搯笏兩邊單跪對舉中書令執笏進跪稱中書令臣某讀冊讀訖俛伏興中書令俟冊興先退通事舍人引隆自東階復本班訖太常卿降復寶床前昇冊官並進與捧冊官等取冊匣興置於殿東間褥位案上西向捧舉冊官降自西階東向立以俟次捧寶官與昇寶官俟讀冊中書令讀訖出並進前取寶盞升太常博士通事舍人分引寶太常卿側身導寶先升奉寶司徒讀寶侍中舉寶官捧寶

官於寶後以次從升寶初行樂奏肅寧之曲進至殿上博士舍人俱退不升並於前楹稍西立俟讀寶侍中於欄子外前楹間稍西立以俟舉寶官捧寶官立於其後奉寶司徒從從升至褥位搯笏少前跪置訖執笏俛伏興樂止司徒退於前楹西立以俟太常卿少退東向立昇寶官立於其後皆東向捧寶官先入舉寶官次入讀寶侍中又次入捧寶官四負皆搯笏雙跪捧舉寶官二負亦搯笏兩邊單跪對舉侍中執笏進跪稱侍中臣某讀寶讀訖俛伏興侍中俟寶興先退通事舍人引隆自西階復本班訖昇寶官進前與捧寶舉寶官等取寶盞興置於殿之西間褥位案上

東向捧寶舉寶官等與太常卿俱降自西階及吏部侍郎
皆復本班昇寶官亦退太常博士引奉寶司徒次奉冊太
尉東向立定博士舍人贊引太尉司徒進詣第一墀香案
南褥位立定博士舍人稍退典儀曰拜贊者承傳在位官
皆再拜訖博士舍人二員引太尉詣東階升宮縣奏純誠
享上之曲至階止閣門使二員引太尉進至前立定樂止
閣門使揖贊太尉拜跪賀殿下閣門揖百僚躬身太尉稱
文武百僚具官臣等言致賀詞云云俛伏興退至階上博
士舍人分引太尉降至東階初降宮縣作肅寧之曲復香
案南褥位立定樂止博士舍人少退典儀曰拜贊者承傳
太尉司徒及在位群官俱再拜舞蹈三稱萬歲又再拜訖
通事舍人引攝侍中升自東階進詣前楹間躬承旨退臨
階西向稱有制典儀曰拜贊者承傳太尉司徒及在位群
官俱再拜躬身宣詞云云宣訖通事舍人引侍中還位典
儀曰拜贊者承傳階上下應在位群官俱再拜舞蹈三稱
萬歲又再拜訖博士舍人分引太尉司徒就百僚位初引
宮縣作肅寧之曲至位立定樂止閣門舍人分引應北面
位群官各分班東西相向立定通事舍人引攝侍中并自
東階當前楹間跪奏禮畢俛伏興引降還位扇合簾降協
律郎俛伏興舉麾工鼓祝奏乾寧之曲降座入自東房還

後閣進膳侍衛警蹕如儀扇開樂止捧冊官帥舁冊床人捧寶官帥舁寶床人皆升殿取匣盞蓋訖置於床前引進司官前導通事舍人贊引詣東上閣門上進通事舍人分引文武百僚等以次出歸幕次賜食以俟上壽上冊寶禮畢有司供辦御床及與宴群官位並如曲宴儀攝太常卿與大樂令帥工人入并協律郎各就舉麾位俟舍人報通事舍人引三師以下文武百僚親王宗室等分左右入至殿階下稍南東西相向立通事舍人先引攝侍中版奏中嚴少頃又奏外辦扇合鳴鞭協律郎跪俛伏興工鼓祝宮縣奏乾寧之曲服通夫冠絳紗袍即座簾捲內侍贊扇開

殿上下鳴鞭戛鼓樂止儀使副等添香爐煙升通事舍人引班首已下合班樂奏肅寧之曲至北向位重行立定中間少留班路通事舍人引攝侍中詣東階升至殿上少立閣門舍人引禮部尚書出班前北向俛伏跪奏稱禮部尚書臣某言請允群臣上壽俛伏興躬身通事舍人引攝侍中少退舍人贊禮部尚書再拜訖贊祗候復本班內侍局進御床入次良醞令於殿下橫階南酌酒訖典儀曰拜贊者承傳在位官皆再拜隨拜三稱萬歲訖平立太常博士通事舍人分引攝上公由東階升初升宮縣奏肅寧之曲殿上舍人少退二閣使揖上公進至進酒褥位樂止宣徽

使以爵授上公上公搢笏受爵詣榻前跪進受爵訖上公執槃授宣徽使訖二閣使揖上公入欄子內贊拜跪殿下閣門揖百僚皆躬身通事舍人揖攝侍中進詣前楹間躬承旨退臨階西向稱有制典儀曰拜贊者承傳上公及在位群官皆再拜隨拜三稱萬歲訖躬身宣曰得公等壽酒與公等內外同慶閣門舍人贊宣諭訖上公與百僚皆舞蹈五拜訖閣門舍人引百僚分班東西序北向立博士舍人再引上公自東階升宮縣奏肅寧之曲至進酒褥位樂止上公搢笏宣徽使授上公槃上公詣欄子內褥位跪舉酒宮縣奏景命萬年之曲飲訖樂止上公進受虛爵訖復

褥位以爵授宣徽使訖二閣使揖上公退內侍局昇御床出博士舍人並進前分引降自東階宮縣作肅寧之曲閣門舍人分引東西兩班隨上公俱復北向位立定樂止典儀曰拜贊者承傳在位官皆再拜三稱萬歲訖平立殿上通事舍人揖攝侍中進詣前楹間躬承旨退臨階西向閣門官先揖百僚躬身侍中稱有制典儀曰拜贊者承傳在位官皆再拜訖躬身宣曰延王公等升殿典儀曰拜贊者承傳在位官皆再拜訖搢笏舞蹈又再拜訖太常博士通事舍人引王公以下合赴宴群官分左右升殿不與宴群官分左右捲班出宮縣奏肅寧之曲百僚至殿上坐後立

樂止內侍局進御床入依尋常宴會再進第一爵酒登歌
奏聖德昭明之曲飲訖樂止執事者行群官酒宮縣作肅
寧之曲文舞入觴行一周樂止尚食局進食執事者設群
官食宮縣奏保大定功之舞三成止出又進第二爵酒登
歌奏天贊堯齡之曲飲訖樂止執事者行群官酒宮縣作
肅寧之曲武舞入觴行一周樂止尚食局進食執事者設
群官食宮縣奏萬國來同之舞三成止出又進第三爵酒
登歌奏慶雲之曲飲訖樂止執事者行群官酒宮縣作肅
寧之曲觴行一周樂止尚食局進食執事者設群官食宮
縣奏肅寧之曲食畢樂止閣門官分揖侍宴群官起立於

席後通事舍人引攝侍中詣榻前佯伏興跪奏侍中臣某
言禮畢佯伏興閣門舍人分引群官俱降東西階內侍局
昇御床出宮縣作肅寧之曲至北向位立定樂止典儀曰
拜贊者承傳在位官皆再拜訖搢笏舞蹈又再拜訖再分
班東西序立扇合簾降殿上下鳴鞭協律郎佯伏跪舉麾
興工鼓祝奏乾寧之曲降座入自東房還後閣侍衛如來
儀內侍贊扇開扇致樂止通事舍人引攝侍中版奏解嚴
所司承旨放仗在位群官皆再拜以次出

元日聖誕上壽儀皇帝陞御座鳴鞭報時畢殿前班小起
居各復侍立位舍人引皇太子并臣僚使客合班入至丹

墀舞蹈五拜平立閣使奏諸道表日皇太子以下皆再拜
引皇太子升殿褥位搢笏捧盞盤進酒皇帝受置於案皇
太子退復褥位轉盤與執事者出笏二閣使齊揖入欄子
內拜跪致詞云元正啟祚品物咸新恭惟皇帝陛下與天
同休若聖節則云萬壽令節謹上壽卮伏願皇帝陛下萬
歲萬歲萬萬歲祝畢拜興復褥位同殿下臣僚皆再拜宣
徽使稱有制在位皆再拜宣荅曰履新上壽與卿等內外
同慶聖節則曰得卿壽酒與卿等內外同慶詞畢舞蹈五
拜齊立皇太子搢笏執盤臣僚分班教坊奏樂皇帝舉酒
殿上下侍立臣僚皆再拜皇太子受盞盞退立褥位轉盤

盞與執事者出笏左下殿樂止合班在位臣僚皆再拜分
引與宴官上殿次引宋國人從至丹墀再拜不出班奏聖
躬萬福再拜喝有勅賜酒食又再拜各祗候平立引左廊
立次引高麗夏人從如上儀畢分引左右廊立御果床入
進酒皇帝飲則坐宴侍立臣皆再拜進酒官接盞還位坐
宴官再拜復坐行酒傳宣立飲訖再拜坐次從人再拜坐
三盞致語揖臣使并從人立誦口號畢坐宴侍立官皆再
拜坐次從人再拜坐食入七盞曲將終揖從人立再拜畢
引出闈曲時揖臣使起再拜下殿果床出至丹墀合班謝
宴舞蹈五拜各祗候分引出

大定六年正月上御大安殿受皇太子以下百官及外國使賀賜宴文武五品以上侍坐者有定負爲常制十七年詔以皇族袒免以上親雖無官爵封邑若與宴當有班次禮官言按唐典皇家周親視三品大功親小功尊屬視四品小功親總麻尊屬視五品總麻袒免以上視六品上命以此制爲班次

朝參常朝儀天眷二年五月詳定常朝及朔望儀准前代制以朔日六日十一日十五日二十一日二十六日爲六參日後又定制以朔望日爲朝參餘日爲常朝凡朔望朝參日百官卯時至幕次皇帝辰刻視朝供御擎手傘子直

於殿門外分兩面排立司辰入殿報時畢皇帝御殿坐鳴鞭閣門報班齊執擎儀物內侍分降殿階兩傍面南立宿衛官自都點檢至左右親衛祇應官自宣徽閣門祇候先兩拜班首少離位奏聖躬萬福兩拜擎手傘子先於殿門外東西向排立俟奏聖躬萬福時即就位北面山呼聲喏起居畢即相向對立擎御傘直立左班內侍上都點檢以次陞殿副點檢在少南東西相向立左右衛在殿下東西相向立閣門乃引親王班贊班首名以下再拜訖班首少離位奏聖躬萬福歸位再拜畢先退次引文武百僚班首以下應合朝參官并府運六品以上官皆左入至丹墀之

東西向鞠躬畢閣門通唱復引至丹墀閣門贊班首名以下起居舞蹈五拜又再拜畢領省宰執陞殿奏事殿中侍御史對立於左右衛將軍之北少前修起居東西對立於殿欄子內副階下餘退右出初帝就坐置寶匣於殿階上東南角後定制師傅起居畢御案始東入置定捧案內侍東西分下侍殿隅直日主寶捧寶當殿叩欄奏封全符寶郎及當監印郎中各一員監當手分令史用印訖主寶吏封授主寶俟奏事畢進封訖內侍徹案若常朝則親王班退引七品以上職事官分左右班入丹墀再拜班首稍前起居畢復位再拜宰執升殿餘官分班退

大定二年五月命臺臣定朝參禮五品已上官職趨朝朝服入局治事則展皂自來朝參除殿前班外若遇朔望自七品已上職事官皆赴其餘朝日五品已上職事官得赴六品已下止於本司局治事如左右司員外郎侍御史記注院等官職雖不係五品亦赴朝參若拜詔則但有職事并七品已上散官皆赴朝參吏員令譯史通事檢法各於本局待官負朝退赴局簽押文字不得於宮內署押七品已下流外職遇朝日亦不合入宮如左右司都事有須合取奏事乃聽入宮七品已上職事官如遇使客朝辭見日依朔望日皆赴若元日聖節拜詔車駕出獵送迎詣祖廟

燒飯但有職事并七品已上散官皆赴凡親王宗室已命
官者年十六以上皆隨班赴起居大定五年右諫議大夫
移刺子敬言猛安謀克不得與州鎮官隨班入見非軍民
一體之意上是其言責宣徽院令隨班入見凡班首遇朝
參有故不赴以次押班凡五品以上及侍御史尚書諸司
郎中太常丞翰林修撰起居注殿中侍御史補闕拾遺赴
召或假一月以上若除官出使之類皆通班入見辭謝除
官於殿門外見謝班皆舞蹈七拜辭班四拜門見謝辭並
再拜

肆赦儀大定七年正月十一日上尊冊禮畢十四日應天
門頒赦十一年制同前期宣徽院使率其屬陳設應天門
之内外設御座于應天門上又設更衣御幄於大安殿門
外稍東南向閣門使設捧制書箱案於御坐之左少府監
設鷄竿於樓下之左竿上置大盤盤中置金鷄鷄口銜絳
幡幡上金書大赦天下四字卷而銜之盤四面近邊安四
大鐵鑲盤底四面近邊懸四大朱索以備四伎人攀緣又
設捧制書木鶴仙人一以紅繩貫之引以轆轤置於御前
欄干上又設捧鶴畫臺於樓下正中臺以弩手四人對舉
大樂署設宮縣於樓下又設鼓一於宮縣之左稍北東向
兵部立黃麾仗於門外刑部御史臺大興府以囚徒集於

左仗外御史臺閣門司設文武百官位於樓下東西相向
又設典儀位於門下稍東西向宣徽院設承受制書案於
畫臺之前又設皇太子侍立褥位於門下稍東西向又設
皇太子致賀褥位於百官班前又設協律郎位於樓上前
楹稍東西向尚書省委所司設制書位於百官班之北稍
東西向司天臺鷄唱生於東闕樓之上尚衣局備皇帝常
服如常日視朝之服尚輦設輦於更衣御幄之前躬謝禮
畢皇帝乘金輅入應天門至幄次前侍中俛伏跪奏請降
輅入幄俛伏興皇帝降輅入幄簾降少頃侍中奏中嚴又
少頃俟典贊儀引皇太子就門下侍立位通事舍人引群

官就門下分班相向立侍中奏外辦皇帝服常朝服尚輦
進輦侍中奏請升輦繖扇侍衛如常儀由左翔龍門踏道
升應天門至御座東侍中奏請降輦升座宮縣樂作所司

索扇

五十柄

扇合皇帝臨軒即御座樓下鳴鞭簾捲扇開執

御繖者張於軒前以障日樂止東上閣門使捧制書置於
箱閣門舍人二負從以俟引繩降木鶴仙人通事舍人引

文武群官合班北向立宮縣樂作凡分班合班則樂作立
定即止典儀曰再拜在位官皆再拜訖分班相向立侍中
詣御座前承旨退稍前南向宣曰奉勅樹金雞通事舍人
於門下稍前東向宣曰奉勅樹金雞退後位金雞初立大

樂署擊鼓樹訖鼓止竿木伎人四人緣繩爭上竿取雞所
銜絳幡展示訖三呼萬歲通事舍人引文武群官合班北
向立樓上乘鶴仙人捧制書循繩而下至書臺閣使奉承
置於案閣門舍人四員舉案又二員對捧制書閣使引至
班前西向稱有制典儀曰拜在位官皆再拜訖以制書授
尚書省長官稍前搢笏跪受訖以付右司官右司官搢笏
跪受訖長官出笏俛伏興退復位右司官捧制書詣宣制
位都事對捧右司官宣讀至咸赦除之所司帥獄吏引罪
人詣班南北向躬稱脫枷訖三呼萬歲以罪人過右司官
宣制訖西向以制書授刑部官跪受訖以制書加於笏上

以付其屬歸本班典儀曰拜在位官皆再拜舞蹈又再
拜典贊儀引皇太子至班前褥位立定典儀曰拜皇太子
已下群官皆再拜典儀引皇太子稍前俛伏跪致詞俛伏
興典儀曰再拜皇太子已下群官皆再拜搢笏舞蹈又再
拜侍中於御座前承旨退臨軒宣曰有制典儀曰再拜皇
太子已下群官皆再拜侍中宣荅宣訖歸侍位典儀曰再
拜皇太子已下群官皆再拜搢笏舞蹈又再拜訖典贊儀
引皇太子至門下褥位通事舍人引群官分班相向立侍
中詣御座前俛伏跪奏禮畢俛伏興退復位所司索扇宮
縣樂作扇合簾降皇帝降座樂止樓下鳴鞭皇帝乘輦還

內繖扇侍衛如常儀侍中奏解嚴通事舍人承勅群臣各
還次將士各還本所

臣下拜赦詔儀宣赦日於應天門外設香案及設香輿於
案前又於東側設卓子自皇太子宰臣以下序班定閣門
官於箱內捧赦書出門置於案閣門官案東立南向稱有
勅贊皇太子宰臣百僚再拜皇太子少前上香訖復位皆
再拜閣門官取赦書授尚書省都事都事跪受及尚書省
令史二人齊捧同升於卓子讀在位官皆跪聽讀訖赦書
置於案都事復位皇太子宰臣百僚以下再拜搢笏舞蹈
執笏伉伏興再拜拱衛直以下三稱萬歲訖退其降階者

禮亦准此惟不稱萬歲其外郡尚書省差官送赦書到京
府節鎮先遣人報長官即率僚屬吏從備旗幟音樂綵輿
香輿詣五里外迎見送赦書官即於道側下馬所差官亦
下馬取赦書置綵輿中長官詣香輿前上香訖所差官上
馬在香輿後長官以下皆上馬後從鳴鈺鼓作樂導至公
廳從正門入所差官下馬執事者先設案并望闕褥位於
庭中香輿置於按之前又設所差官褥位在案之側又設
卓子於案之東南所差官取赦書置於案綵輿退所差官
稱有勅長官以下皆再拜長官少前上香訖退復位又再
拜所差官取赦書授都目都目跪受及孔目官二員三人

齊捧赦書同高几上宣讀在位官皆跪聽讀訖都目等復位長官以下再拜舞蹈俛伏興再拜公吏以下三稱萬歲禮畢明日長官率僚屬音樂送至郭外

志第十七

志第十八

金史三十七

開府儀同三司上柱國錄軍國重事尚書省右僕射國史領經筵事都統兼太子太師

勅修

禮十

冊皇儀 冊皇太子儀 皇太子受賀儀 皇太子與百官相見儀

冊皇后儀天德二年十月九日冊妃徒單氏為皇后前一

日儀鸞司設坐勤政殿南向設群臣次於朝堂大樂令展

宮縣於殿庭設協律郎舉麾位於樂縣西北東向閣門設

百官班位於庭並如常朝之儀又設典儀位於班位之東

北贊者二人在南少却俱西向設冊使副位於殿門外之

東又設冊使副受命位於百官班前又設冊寶幄次二於

殿後東廂俱南向其日諸衛勒所部略列黃麾細仗於庭符寶郎奉八寶置於左右吏部侍郎奉冊禮部侍郎奉寶匣皆置於床訖出就門外班大樂令協律郎樂工典儀贊者各入就位群官等依時刻集朝堂俱就次各服朝服侍中約刻板奏請中嚴通事舍人引群官入就庭東西相而立以北爲上又引冊使副立於東偏門西向門下侍郎引主節奉節立於殿下東廊橫街北中書令中書侍郎同舉捧冊官奉冊床立於節南侍中門下侍郎帥舉捧寶官奉寶床立於冊床之南俱西面侍中版奏外辦殿上索扇協律郎舉麾宮縣作皇帝服通天冠絳紗袍出自東房由直

華蓋警蹕侍衛如常儀即座南向坐簾捲樂止通事舍人引冊使副入宮縣作使副就受命位侍中中書令門下侍郎中書侍郎舉捧官依舊西面立群臣合班橫行北面如常朝之儀立定典儀曰再拜贊者承傳班首已下群官在位者皆再拜班首問起居又再拜閣門官引攝侍中出班承制降詣使副東北西向稱有制使副稍前鞠躬再拜攝侍中宣制曰命公等持節授后冊寶宣制訖又俱再拜侍中還班門下侍郎引主節詣冊使所主節以節授門下侍郎門下侍郎執節西向授太尉太尉受付主節主節立於使副之左右門下侍郎退還班位中書侍郎引冊床門下

侍郎引寶床立於冊使東北西向以次授與太尉太尉皆捧受冊床置於北寶床置於南侍中中書令禮儀使舉捧冊寶官及舁床者退於東西搏道之左右相向立門下侍郎中書侍郎退還班位典儀曰再拜贊者承傳群官在位者皆再拜訖分班東西相向位舉捧舁冊寶床者進冊床先行讀冊官次之寶床次行讀寶官次之舉舁官各分左右通事舍人引冊使隨之以行持節者前導太尉初行宮縣樂作出殿門樂止攝侍中出班升殿奏侍中臣言禮畢殿上索扇簾降宮縣作降座入自東房樂止通事舍人引群官在位者以次出俟太尉司徒復命禮畢還內先是有

司預設太尉司徒本品革車鹵簿於門外至殿門左右排列俟使副出鼓吹振作禮儀使舉捧官執節者并擡舁人以冊寶少駐於泰和門太尉司徒及讀冊寶官暫歸幕次內侍閣門引入泰和殿俟至殿下位鼓吹止有司預供張泰和殿設皇后座於殿前殿上垂簾又設東西房於座之左右稍北又設受冊位於殿庭西階之南東向又設內命婦次於殿之左右大樂令設宮縣於庭協律郎設舉麾位於殿上又設冊寶次於門外又設行事官次於門左右又設外命婦次於門之內其日諸衛於殿門外略設黃麾細仗有司設二步障於殿之西階簾前設扇左右各十紅繖

一在西階欄干外又設舉冊寶案位於使副之前北向又設宣徽使位於北廂南向司贊設內外命婦以下陪列位於殿庭塼道之左右每等重行異位北向內命婦在後又設司贊位於東階東南贊者二人在南少退俱西向贊明執事官大樂令等各就位皇后常服乘龍飾肩輿至泰和殿後閣近仗導衛如常儀宣徽使奏中嚴冊使副入門宮縣作俟冊使庭中立樂止冊在北寶在南使副立於床後禮儀使帥持節者立於前舉捧冊寶官立於冊寶床左右讀冊寶官各立於其後宣徽使奏外辦內侍閣門官引后出後閣宮縣作簾捲皇后降自西階左右步障繖扇從至

階下望勤政殿御閣所在立樂止冊使進立於右宣曰有制閣門使內侍贊再拜冊使宣曰制遣太尉臣某司徒臣某恭授后冊寶閣門使內侍贊再拜冊使少退中書令侍中及舉捧官率擡舁人奉冊寶以次進於前宮縣作冊寶床自東階升並置於殿之前楹間冊床在北寶床在南中畱讀冊寶官立位並去帕及蓋擡舁人執之退立於西朶殿舉擡官分左右相向立讀冊寶官各立於床之東西向立既定樂止閣門使內侍贊再拜搥謝表官以表授左立內侍內侍以授后受訖以付右立內侍內侍持表立於右閣門使贊再拜訖冊使退宮縣作持表內侍以表付閣門

官隨冊使行冊使副至門鼓吹振作如來儀入西偏門鼓吹止冊使副至御閣所在俛伏跪奏太尉臣某司徒臣某奉制授冊寶禮畢俛伏興退持表閣門官進表近侍接入進讀訖退初冊使退及門樂止閣門內侍引后自西階升殿宮縣作繖扇止於簾外退於左右朶殿前步障止於階下卷之后於座前南向立樂止中書令詣冊床南立北向稱中書令臣某謹讀冊讀畢降自東階立於欄外第一墀上西向次侍中詣寶床南立北向揖稱侍中臣某讀寶讀畢降階立於中書令之北西向內侍閣門引升座宮縣作定樂止舉捧官以次招擡昇人持帕蓋覆匣床奉置殿

之左右冊床在東寶床在西置訖舉捧官以次降階立於中書令侍中之後立定合班北向閣門贊再拜拜訖降東階退出殿門其擡昇人置冊寶床於東西訖各由朶殿下階於侍中等班後直出殿門以俟復入擡昇入宮受冊表謝訖內侍跪奏禮畢閣門引內外命婦陪列者以次進就北向位班首初行宮縣作至位樂止閣門曰再拜命婦皆再拜閣門引班首自西階升樂作至階樂止進當座前北向躬致稱賀訖降自西階樂作至位樂止閣門曰再拜舍人承傳命婦等皆再拜閣門使前承令降自西階詣命婦前西北東向稱有教旨命婦等皆拜閣門使宣曰祇奉聖

恩授以冊寶榮幸之至競厲增深所賀知舍人曰再拜命婦皆再拜訖內侍引內命婦還宮班首初行樂作出門樂止內侍引外命婦出次宣徽使奏稱禮畢降坐宮縣作入東房樂止歸閣宮縣作至閣樂止更常服內侍承教旨宣外命婦入會並如常儀會畢閣門引外命婦降階橫班北向舍人曰再拜訖以次出還宮如來儀中書門下侍郎復以引進司帥擡舁人進冊寶入內付與都點檢司退別日會群官會妃主宗室等賜酒設食簪花教坊作樂如內宴之儀十一日朝末壽永寧兩宮皇后既受冊越二日內侍設座於所御殿南向其日夙興宣徽使版奏中嚴質明詣侍衛宮人俱詣寢殿奉迎宣徽使版奏外辦合首飾禕衣御車內侍前導降自西階以出侍衛如常儀至太后之裏門外降車障扇侍衛如常儀入立於西廂東向將至宣徽使版奏請中嚴既降車宣徽使版奏外辦太后常服宣徽使引升座南向宣徽使引后進升自西階北面再拜進跪致謝詞存撫賜酒食並如家人之儀禮畢宣徽使焚香再拜訖宣徽使引降自西階以出出門宣徽使奏禮畢降座入宮

奉冊皇太后儀天德二年正月詔有司擇日奉冊唐殷國妃岐國太妃仍別建宮名合行典禮禮官檢詳條具以聞

其日質明有司各具繖扇侍衛如儀及兵部約量差軍兵并文武百官詣兩宮迎請引導皇太后入內並赴受冊殿入御幄侍衛如式次奉冊太尉等俱以冊置於案奉寶司徒等俱以寶置於案皆盛以匣覆以帕詣別殿門外幄次教坊提點率教坊入侍衛官各就列皇帝常服乘輿至別殿後幄次通事舍人引宣徽使版奏中嚴復位少頃又奏外辦幄簾卷教坊樂作扇合兩宮皇太后出自後幄並即御座南向扇開樂止分左右退通事舍人引文武百僚班左入依品重行西向立定通事舍人喝起居班依常朝例起居七拜訖引文武百僚班分東西相向立通事舍人太常

博士贊引太常卿前導押冊官押冊而行奉冊太尉讀冊中書令舉冊官等以次從之次押寶官押寶而行奉寶司徒讀寶侍中舉寶官等以次從之俱自正門入教坊樂作至殿庭西階下少東北向於褥位少置樂止冊北寶南通事舍人太常博士贊引太常卿前導押冊官押冊升樂作奉冊太尉等從之進至兩宮皇太后座前褥位樂止兩宮冊寶齊讀舉冊官夾侍奉冊太尉各搢笏北向跪俛伏興退立讀冊中書令俱進向冊前跪奏稱攝中書令具官臣某謹讀冊舉冊官單跪對舉中書令各搢笏讀訖執笏俛伏與搢笏捧冊興於位東迴冊函北向並進跪置於御座前褥

位中書令舉冊官俱降還位奉冊太尉並降階東向以俟
押寶官押寶升樂作奉寶司徒等從之進至兩宮皇太后
座前褥位樂止舉寶官夾侍奉寶司徒各搢笏北向跪俛
伏興退立讀寶侍中俱進當寶前跪奏稱攝侍中具官臣
某謹讀寶舉寶官單跪對舉侍中各搢笏讀訖執笏俛伏
興搢笏捧寶與於位東迴寶西北向並進跪置於御座前
褥位冊之南通事舍人太常博士贊引太尉司徒以次應
行事官俱降自西階復本班序立宣徽使一員詣皇帝御
幄前俛伏跪奏臣某謹請皇帝詣兩宮皇太后前行稱賀
之禮俛伏興贊引皇帝再拜又奏請北向跪皇帝賀曰嗣

皇帝臣某言

云云

俛伏興又再拜訖又奏請皇帝少立內

侍承旨退西向稱兩宮皇太后旨

云云

皇帝再拜宣徽使

前引皇帝歸幄常服乘輿還內侍衛如來儀應階下文武

百僚重行立定通事舍人喝拜在位皆再拜通事舍人引

太師詣西階升俛伏跪奏稱文武百僚具官臣某等稽首

言皇太后殿下顯對冊儀永安帝養仰祈福壽與天同休

俛伏興降自西階復位立定通事舍人贊在位官皆再拜

舞蹈三稱萬歲又再拜宣徽使升自東階取旨退臨階西

向稱兩宮皇太后旨通事舍人贊在位官皆再拜畢宣曰

公等忠敬盡心推崇協力膺茲令典感愧良深宣訖還位

通事舍人贊謝宣諭拜在位官皆再拜舞蹈三稱萬歲又再拜通事舍人分引應北向官各分班東西立宣徽使升自東階奏稱具官臣等言禮畢降還位扇合皇太后並興教坊樂作降座還殿後帷次扇開樂止通事舍人引宣徽使奏解嚴中書侍郎等各帥捧冊床官升殿跪捧冊並置於床次門下侍郎等各帥捧寶床官升殿跪捧寶並置於床訖通事舍人引詣東上閣門投進所司文武百僚以次出皇太后常服乘輿各還本官引導如來儀文武百僚詣東上閣門拜表賀皇帝退禮畢各赴本宮受內外命婦稱賀所司預於殿內設皇太后御座司賓引內外命婦於殿

庭北向依序立尚儀奏請皇太后常服即座司贊曰再拜命婦皆再拜司賓引班首詣西階升跪賀稱妾某氏等言伏惟皇太后殿下天資聖善昭受鴻名凡在照臨不勝欣抃興降階復位司贊曰再拜內外命婦皆再拜尚宮承旨降自西階於命婦之北東向立司贊曰再拜在位者皆再拜尚宮乃宣答曰膺茲典禮感愧良深司贊曰再拜在位者皆再拜退赴別殿賀皇帝亦如賀皇太后之儀惟不致詞不宣答

冊皇太子儀大定八年正月冊皇太子禮官擬奏皇太子乘輿至翔龍門東宮官導從不乘馬冊皇太子前三日遣

使同日奏告天地宗廟冊前一日宣徽院帥儀鸞司設御座於大安殿當中南向設皇太子次於門外之東西向又設文武百僚應行事官東宮官等次於門外之東西廊又設冊寶幄次於殿後東廂俱南向又設受冊位於殿庭橫階之南工部官與監造冊寶官公服自製造所導引冊寶床由宣華門入約宣徽院同進呈畢赴幄次安置大樂令帥其屬展樂縣於庭其日兵部帥其屬設黃麾仗於大安殿門之內外其日質明文武百僚應行事官並朝殿入次東宮官各朝服自東宮乘馬導從至左翔龍門外下馬入就次通事舍人分引百官入立班東西相向次引侍中中

書令門下侍郎中書侍郎及捧昇冊寶官詣殿後帳次前立少頃奉冊寶出幄次由大安殿東降至庭中褥位權置訖奉引冊寶官立於其後皇太子服遠游冠朱明衣出次執圭三師三少已下導從立於門外侍中奏中嚴符寶郎奉八寶由東西偏門分入升置御座之左右侍中奏外辦內侍承旨索扇扇合皇帝服通天冠絳紗袍以出曲直華蓋侍衛如常儀鳴鞭宮縣樂作皇帝出自東序即御座爐煙升扇開簾捲樂止典贊儀引皇太子入門宮縣樂作至位樂止師少已下從人立於皇太子位東南西向典儀贊皇太子再拜搢圭舞蹈又再拜奏聖躬萬福又再拜引近

東西向立師少已下并奉引冊寶管等各赴百官東班樂作至位樂止通事舍人引百官俱橫班北向典儀贊拜在位官皆再拜搢笏舞蹈又再拜起居又再拜畢百官各還東西班師少已下并行事官各還立位典贊儀引皇太子復受冊位樂作至位樂止侍中承旨稱有制皇太子已下應在位官皆再拜躬身侍中宣制曰冊某王爲皇太子又再拜通事舍人太常博士引中書令詣讀冊位中書侍郎引冊匣置於前捧冊官西向跪捧皇太子跪讀畢俛伏興皇太子再拜中書令詣捧冊位奉冊授皇太子搢圭跪受冊以授右庶子右庶子跪受皇太子俛伏興右庶子以冊

興置於床中書令已下退復本班次通事舍人太常博士引侍中詣奉寶位門下侍郎引寶盞立於其右侍中奉寶授皇太子搢圭跪受以換左庶子左庶子跪受皇太子俛伏興左庶子以寶興置於床侍中已下退復本班典贊贊再拜畢引皇太子退初行樂作左右庶子帥其屬拜冊寶床匣以出出門樂止侍中奏禮畢內侍承旨索扇扇合簾降鳴鞭樂作皇帝降座入自西序還後閣侍衛如來儀扇開樂止侍中奏解嚴所司承旨放仗衛以次出皇太子入次改服公服還東宮導從如來儀冊後二日兵部設黃麾仗於仁政殿門之內外陳設並如大安殿之儀百官服朝

服皇太子公服至次改服遠游冠朱明衣通事舍人引百官入至階下立班東西相向典儀引皇太子執圭出次立於門外侍中奏中嚴少頃又奏外辦皇帝出自東序即座簾捲通事舍人引百官俱橫班北向典儀贊拜在位官皆再拜搢笏舞蹈又再拜起居又再拜訖分班皇太子捧表入至拜表位立俟閣門使將至單跪捧表閣門使接表皇太子俛伏興典儀贊再拜搢圭舞蹈又再拜俟讀表畢侍中承旨退稱有制典儀贊再拜興躬身侍中宣訖典儀贊再拜搢圭舞蹈又再拜引皇太子退侍中奏禮畢扇合鳴鞭入西序還後閣侍衛如來儀侍中奏解嚴放仗百官以次出後二日百官奉表稱賀如常儀

正旦生日皇太子受賀儀大定二年世宗命有司議親王百官及妃主命婦見皇太子禮有司按唐宋舊儀擬親王宗室賀皇太子依冊畢受賀禮然唐禮元正復有降階見伯叔答群官再拜之文又無妃主命婦見太子之禮稽首令文應致恭之官相見或貴賤殊隔或長幼親戚任從私禮自今若在東宮候皇太子便服則當從私禮接見若三師以下遇皇太子誕日在御前則候皇太子先進酒畢百官望皇太子再拜班首跪進酒又再拜若賜酒即當殿跪飲畢又再拜以爲定制命班行之十二月晦皇太子奏狀

曰按禮文親王并一品宗室皆北面拜伏臣但答揖而已
雖曰尊宗子而在長幼博叙之間誠所未安當時遽蒙頒
降未獲謙讓明日元正有司將舉此禮伏望聖慈許臣答
拜庶敦親親友愛之義上從其請命尚書省頒下所司若
皇太子生日則公服左上露臺欄子外先再拜二閣使齊
揖入欄子內拜跪祝畢就拜興復位再拜又再拜接臺進
酒退跪候飲畢接盞復位轉臺與執事者再拜宣徽使以
酒進皇帝親賜酒接盞稍退跪飲畢宣徽使接盞復位再
拜復揖入欄子內跪搢笏受賜物畢出笏興復位再拜退
更衣入殿稍東西向立皇妃等進勸生日酒皇太子跪皇
妃等亦跪飲畢各再拜群官致賀則其日質明皆公服集
於門外少詹事奏請內嚴又奏外備典儀引升座文武官
臣入就庭下重行北向立典儀曰再拜在位官皆再拜班
首少前跪奏元正首祚生日則云慶誕令辰伏惟皇太子
殿下福壽千秋賀畢復位典儀曰再拜宮臣皆再拜坐受
分東西序立次引東宮三師於殿上三少於殿柱外北向
東上立皇太子詣南向褥位典儀曰再拜師少皆再拜班
首同前稱賀復位執事者酌酒一卮班首奉進樂作飲訖
樂止回勸師少畢各復位典儀贊師少再拜皇太子答拜
師少出皇太子就坐次引親王入欄子內一品宗室於欄

子外餘宗室序班庭下拜致賀進酒如上儀皇太子答拜畢就坐復引隨朝三師三公宰執於殿上三品以上職事官於露階上四品以下於庭下北向每等重行以東爲上立皇太子詣褥位典儀曰再拜上下皆再拜畢班首少前致賀復位執事者酌酒一卮班首奉進樂作飲畢樂止如有進獻如常儀回勸三師三公餘殿上群官則令執事者以盤行酒飲畢典儀曰再拜上下皆再拜乃答拜引群官以次出少詹事跪奏禮畢自是歲賀爲定制

皇太子與百官相見儀三師三公攔子內北向躬揖班首稍前問候皇太子離位稍前正南立答揖宰執及一品職事官扣攔子北向躬揖答揖同前二品職事官攔子外稍南躬揖皇太子起揖三品職事官露階稍南躬揖皇太子坐揖四品以下職事官庭下躬揖跪問候皇太子坐受太子太師太傅太保與隨朝三師同東宮三少與隨朝二品同詹事已下並在庭下面北每品重行以東爲上再拜稍前問候又再拜皇太子坐受大定二年所定也七年定制皇太子赴朝許與親王宰執相見餘官宗室並迴避後亦許與樞密使副御史大夫判宗正東宮三師相見九年定制凡皇太子出於都門三里外設褥位三公宰執以下公服重行立皇太子便服三公宰執以下鞠躬班首致辭云

青宮萬福再拜皇太子答拜退迎禮皆同

志第十八

志第十九

金史三十八

開府儀同三司上柱國錄軍國重事尚書丞相修 國史領 經筵事都總裁臣脫脫赤

救修
禮十一 外國使入見儀 曲宴儀 朝辭儀 新定夏使儀

外國使入見儀皇帝即御座鳴鞭報時畢殿前班小起居畢至侍立位引臣僚左右入丹墀小起居畢宰執上殿其餘臣僚分班出閣門使奏使者入見榜子先引宋使副出笏捧書左入至丹墀北向立閣使左下接書捧書者單跪授書拜起立閣使左上露階右入欄內奏封全轉讀畢引使副左上露階齊揖入欄內揖使副鞠躬使少前拜跪附

奏異拜起復位立待宣問宋皇帝時並鞠躬受勅旨再揖
鞠躬使少前拜跪奏畢起復位齊退却引使副左下至丹
墀北嚮立禮物右入左出盡揖使副傍折通班再引至丹
墀舞蹈五拜不出班奏聖躬萬福再拜揖使副鞠躬使出
班謝面天顏復位舞蹈五拜再揖副使鞠躬使出班謝遠
差接伴兼賜湯藥諸物等復位舞蹈五拜各祗候引右出
賜衣次引宋人從入通名已下再拜不出班又再拜各祗
候亦引右出次引高麗使左入至丹墀北嚮略立引使左
上露階立定揖橫使鞠躬正使少前拜跪附奏畢拜起復
位立閣使宣問高麗王時並鞠躬受勅旨畢再揖橫使鞠
躬正使少前拜跪奏畢拜起復位齊退却引左下至丹墀
面殿立定禮物右入左出盡揖使傍折通班畢引至丹墀
通一十七拜各祗候平立引左階立次引夏使見如上儀
引右階立次再引宋使副左入至丹墀謝恩舞蹈五拜各
祗候平立次引高麗夏使並至丹墀三使並鞠躬有勅賜
酒食舞蹈五拜各祗候引右出次引宰執下殿禮畢

曲宴儀皇帝卽御座鳴鞭報時畢殿前班小起居到侍立
位引臣僚并使客左入傍折通班至丹墀舞蹈五拜不出
班奏聖躬萬福又再拜出班謝宴舞蹈五拜各上殿祗候
分引預宴官上殿其餘臣僚右出次引宋使從人入至丹

墀再拜不出班奏聖躬萬福又再拜有勅賜酒食又再拜
引左廊立次引高麗夏從人入分引左右廊立果床入進
酒皇帝舉酒時上下侍立官並再拜接盞畢候進酒官到
位當坐者再拜坐卽行臣使酒傳宣立飲畢再拜坐次從
人再拜坐至四盞餅茶入致語聞鼓笛時揖臣使并人從
立口號絕坐宴并侍立官並再拜坐次從人再拜坐食入
五盞歇宴教坊謝恩畢揖臣使起果床出皇帝起入閣臣
使下殿歸幕次賜花人從隨出戴花畢先引人從入左右
廊立次引臣使入左右上殿位立皇帝出閣坐果床入坐
立並再拜坐次從人再拜坐九盞將曲終揖從人至位再
拜引出聞曲時揖臣使起再拜下殿果床出至丹墀謝恩
舞蹈五拜分引出

朝辭儀皇帝卽御座鳴鞭報時畢殿前班小起居至侍立
位引臣僚合班入至丹墀小起居引宰執上殿其餘臣僚
分班出閣使奏辭膀子先引夏使左入傍折通班畢至丹
墀再拜不出班奏聖躬萬福又再拜揖使副鞠躬使出班
廳闕致詞復位又再拜喝各好去引右出次引高麗使如
上儀亦引右出次引宋使副左入傍折通班畢至丹墀依
上通六拜各祇候平立閣使賜衣馬鞠躬聞勅再拜賜衣
馬畢平身搢笏單跪受別錄物過盞出笏拜起謝恩舞蹈

五拜有勅賜酒食舞蹈五拜引使副左上靈階齊揖入欄
內揖鞠躬大使少前拜跪受書起復位揖使副齊鞠躬受
傳達畢齊退引左下至丹墀鞠躬喝各好去引右出次引
宰執下殿禮畢熙宗時夏使入見改爲大起居定制以宋
使列於三品班高麗夏列於五品班皇統二年六月定臣
使辭見臣僚服色拜數止從常朝起居三國使班品如舊
俟殿前班及臣僚小起居畢宰執升殿餘臣分班畢乃令
行入見及朝辭之禮凡入見則宋使先禮畢夏使入禮畢
而高麗使入其朝辭則夏使先禮畢而高麗使入禮畢而
宋使入夏高麗朝辭之賜則遣使就賜於會同館惟宋使
之賜則庭授舊高麗使至闕皆有私進禮大定五年上以
宋夏使皆無此禮而小國獨有之不可遂命罷之六年詔
外國使初見朝辭則於左掖門出入朝賀賜宴則由應天
門東偏門出入大定二十九年三月章宗以在諒闇免宋
使朝辭太常寺言若不面授書及傳達語言恐後別有違
失遂令宋使先辭靈幄然後詣仁政殿朝辭授書時右丞
相襄言伏見熙宗聖誕七月七日以景宗忌辰避之更爲
翌日復用正月十七日受外國賀今聖誕節若依期令外
方人使過界恐爲雨潦所滯設能到闕或值陰雨亦難行
禮乞以正月十一日或三月十五日爲聖節定宋人過界

之期平章政事張汝霖參知政事劉瑋等言帝王當示信以兩漕路阻輒改之或恐失信且宋帝生日亦五月也是時都在會寧上國遣使賜生日萬里渡越江河尚不避霖潦如期而至今久與宋好不可以小阻示以不實彼若過界多作程頓亦不至留滯縱使兩水愆期而入見猶勝更用他日也御史大夫唐括貢中丞李宴刑部尚書兼右諫議大夫完顏居貞等亦皆言不可上初從之既而竟用襄議令有司移報使明知聖誕之實特改其日以示優待行人之意承安三年正月上諭旨有司曰比聞宋國花宴殿上不設餽饌至其歇時乃備於廊下今花宴上賜食甚爲

拘束若依彼例可乎且向者人使見辭殿上亦嘗有酒禮今已移在館宴矣有司奏曰曲宴之禮舊矣彼方酒一行食一上必相須成禮而國朝之例酒既罷而食始進至於花宴日宋使至客省幕次有酒禮而我使至其幕則有食而無酒各因其舊不必相同古者宴禮設食以示慈惠今遽更之恐遠人有疑失朝廷寵待臣子之意乃命止如舊正大元年十月夏國遣使修好二年九月夏國和議定以兄事金各用本國年號定擬使者見辭儀注云蓋夏人自天會議和臣屬於金八十餘年無兵革事及貞祐之初小有侵掠以至構難十年兩國俱敝至是始以兄弟之國成

和十月遣禮部尚書奧敦良弼大理卿裴滿欽甫侍御史
烏古孫弘毅爲報成使三年十月夏人告哀遣中大夫完
顏履信爲弔祭使夏人以兵事方殷各停使聘四年遣王
立之來聘未復命而夏亡

新定夏使儀注夏國使副及參議各一謂之使都管三上
節中節各五下節二十四謂之三節人從報至行省差
伴使與書表人迓於境入界則先具驛程腰宿之次始至
京兆行省翌日賜宴至河南行省亦然謂之來宴將至京
遣內侍一人以油絹複韜三銀盒貯湯藥二十六品逆於
近境尉氏縣賜之至恩華館舊名燕賓館承安三年更名更衣由宜照

門入預差館伴使副使二負書表四人牽攏官三十人以
俟來使三節人從至會同館謂之聚廳先以館伴使各衙
付之而使者亦以其衙呈然後使副都管上中節人從以
次見館伴使接伴使初相見之儀亦然次以館伴所書表
見人使館伴所牽攏官與下節人互相參見畢乃請館伴
接伴人使副各公服齊出幕次對行上廳攔子外館伴在
北對立先接伴揖次來使副與館伴互展狀揖各傳示再
揖各就位請收笏坐先湯次酒三盞置果殼茶罷執笏迓
前齊起攔子外館伴在南對立先館伴揖次展接伴辭狀
相別揖各傳示再揖通揖分位是日皇帝遣使撫問天使

至館轉銜如館伴初見之儀館伴與天使來使副各公服
齊行至位對立請來使副升拜褥望闕立次請天使升拜
褥稍前立來使副鞠躬天使言有勅乃再拜鞠躬天使口
宣辭畢復位來使再拜舞蹈三拜復位立來使與天使各
展狀相見揖次館伴揖來使令人傳示請館伴天使與來
使對行上廳各赴椅子立通揖謹收笏坐湯酒殺茶並如
前畢執笏近前齊請起至拜褥依前對立請來使副升褥
位進表謝撫問再拜副使平立使跪奉表天使近前搢笏
受之出笏復位來使就拜退復對立來使令人傳示館伴
依例書送天使土物畢展天使辭狀相別揖次館伴揖各

請分位是後每旦暮傳示并牽攏官聲喏如儀到館之明
日遣使賜酒果天使初至轉銜後望拜傳宣皆如撫問之
儀使副單跪以酒果過其側拜舞蹈如儀上廳湯酒茶畢
詣拜褥位跪進謝賜酒果表贈天使土物皆如撫問使禮
押酒果軍亦有土物之贈乃命閣門副使至館習儀初轉
銜前後皆如館伴相見之儀湯茶罷館伴閣副傳示使副
來日入見例當習儀來使副回傳示習儀畢第二盞後當
面勸習儀承受人酒一盞先揖飲酒再拜退三盞果茶罷
執笏近前齊起欄子外南為上對立以來日入見故但揖
而不展辭狀分位乃以入見牌子付閣門持去以付禮進

司來使副以書送土物於引進使及交進物軍真人等閣
門副及習儀承受人各贈土物第三日入見其日質明都
管三節人從皆裹帶館伴與來使副各公服齊請赴馬臺
館伴牽擺官喝排馬來使牽擺官喝牽馬各上馬張蓋都
管馬上奉書在使前至中門外以外爲上對立先來使牽
擺官兩聲喏次館伴牽擺官亦然齊揖各傳示再揖請行
至左掖門外五百步館伴與使副乃左右易位而行揖畢
去門百步去傘下馬出笏對行凡後入稱賀曲宴皆同是
儀來使人從持物者不得入門牽擺官權收之客省令二
人傳示館伴與來使各令人回傳示至客省幕前館伴所

書表在上立齊揖乃入幕先館伴所書表傳示次來使書
表傳示依前欄子外立先揖當面勸酒一盞再揖退引館
伴來使入客省幕內爲上對立揖畢請分位立先館伴揖
次展客省起居狀揖各傳示再揖通揖請赴位立再揖請
收笏坐先湯次酒三盞各有果敬第二盞酒畢客省乃傳
示來使請都管上中節勸酒回傳示畢引都管上中節於
幕次前階下排立先揖飲酒再揖引退第三盞酒畢茶罷
執笏近前齊起幕次前立通揖畢各歸本幕次俟殿上小
起居畢宰執升殿餘臣分班退閣使奏來使見榜子乃先
請館伴入班俟閣門招引乃請客省與來使副對立於幕

前外為上使者奉書揖畢對行至三門外與引揖閣副揖使奉書副出笏後隨左上露臺殿簷柱外奉書單跪舊儀於丹

墀內閣使接書使副就拜立閣使右入欄子內奏封全轉

讀畢故事皆不讀引使副入殿欄子內揖使副鞠躬再拜引少

前跪奏弟大夏皇帝致問兄大金皇帝聖躬萬福再拜興

復位皇帝乃宣問夏皇帝使副鞠躬受旨畢引使少前跪

奏弟大夏皇帝聖躬萬福拜復位立齊退左下階至丹墀

北向立以禮物右入左出盡揖使副傍折通班再引至丹

墀舞蹈五拜不出班代奏聖躬萬福畢再拜引使副前雙

跪皇帝遣入勞問復位謝恩舞蹈五拜再揖使副出班謝

面天顏復位舞蹈五拜再揖閣副鞠躬引使出班謝退至

掖伴兼賜湯藥諸物復位舞蹈五拜喝各祗候引右出至

三門階下與閣副揖別與客省同行至幕次前對揖各歸

幕次引都管上中節左入丹墀立下節於門外階下立齊

鞠躬通名先再拜不出班奏聖躬萬福再拜下節鞠躬聲

喏初一拜呼萬歲次一拜呼萬歲臨起呼萬萬歲喝各祗

候平立引右出乃賜使者衣拜舞皆如賜酒果之儀畢使

者與天使對立次請都管三節人從望闕立天使稍前立

都管人從鞠躬天使傳勅拜謝如使儀就拜畢謝恩再拜

下節鞠躬聲喏如入見儀乃再引入賜以酒食閣門招客

省皆如入見儀至丹墀謝賜衣物再拜舞蹈三拜鞠躬贊
有勅賜酒食舞蹈五拜喝各祗候引右出如前儀歸幕乃
請出館伴與使副幕前對立揖各傳示再揖請行至元下
馬所復左右易位而行揖畢各收笏上馬至館又左右易
位入門內爲上對立先來使牽攏官次館伴牽攏官各聲
若再拜揖畢請分位乃以押伴使賜宴於管押伴至館轉
名銜回畢與館伴來使公服齊詣褥位對立押伴稍前立
先請押伴館伴上褥位望闕拜謝坐再拜舞蹈三拜起先
請押伴上副階上立乃引使副上褥位望闕亦謝坐儀同
上乃與館伴對行上廳押伴在副階上與使副展衣狀來

使副先令人報上聞押伴回傳示再揖請押伴先入於
前倚位立館伴與使副對揖各就位立通揖請端笏坐
入乃於拜席上排立都管人從湯盞出揖起押伴等雜
立都管人從鞠躬拜下節人聲喏如入見儀呼萬歲畢
押伴及使副皆就坐引三都管上中節分左右上廳南入
北爲上下節在西廊下立候押伴等初盞畢樂聲盡坐至
三盞下食畢四盞下酒畢押伴傳示來使面勸都管上中
節酒一盞來使答上聞以都管上中節於副階下排立先
揖飲傳台旨勸再揖退至五盞下酒畢茶入都管人從於
拜席上排立待茶罷揖押伴等起離位立都管人從鞠躬

喝謝恩拜下節聲喏如上儀就位立請押伴等齊下廳
拜褥對立先請使副就褥位謝恩再拜舞蹈三拜復位乃
請押伴館伴就褥位謝如上儀復位第四日命押宴官賜
宴官就館宴先賜宴天使轉銜如前儀各公服請館伴天
使與來使就褥位對立先請使副就褥位望闕立次請賜
宴天使就褥位稍前使副鞠躬天使傳宣使副拜謝皆如
前儀使副與天使互展狀起居揖次館伴揖使副令人傳
示館伴依例請賜宴天使茶酒館伴暫歸幕來使副與天
使主賓對行上廳於西間內各詣椅位揖收筯坐先湯次
酒三盞果殺茶罷執筯近前請起賜宴天使暗退請押宴

使至褥位立次請館伴齊就褥位望闕再拜平身揖筯鞠
躬三舞蹈跪左膝三叩頭出筯就拜興再拜復位對立請
押宴上廳次請來使副詣褥位謝坐再拜舞蹈三拜請分
階升廳欄子外內爲上對立先館伴揖次互展押宴起居
狀相見揖各傳示再揖通揖請就位詣椅位立通揖請端
筯坐以御宴不敢用踏床湯入都管三節人從於拜席上
排立湯盞出押宴離位立揖都管人從鞠躬下節人從聲
喏呼萬歲如入見儀喝各就坐請押宴等坐引都管上中
節分左右上廳北入南爲上立下節於西廊下南入北爲
上立候押宴等初盞畢樂聲盡坐至五盞後食六盞七盞

雜劇八盞下酒畢押宴傳示使副依例請都管上中節當
面勸酒使者答上聞復引都管上中節於欄子外階下排
立先揖飲酒再揖退至九盞下酒畢教坊退乃請賜宴天
使於幕次前候茶入乃於拜席排立都管三節人從茶盞
出揖起押宴官等離位立揖都管人從鞠躬喝謝恩拜下
節聲喏呼萬歲如入見儀且鞠躬喝各祇候請押宴等官
齊出分階下廳與天使對行至拜褥前立請使副就位望
闕謝恩再拜舞蹈三拜畢依位立請押宴館伴齊詣褥位
謝恩來使乃進謝御宴表先再拜平身立使跪捧表天使
近前措笏受表出笏復位使就拜退復位立使副上聞依

例書送天使土物領畢天使卽以物報之然後展天使辭
狀再揖次館伴揖通揖請分位是日來使於宴下監酒等
官及教坊人等皆有所贈第五日稱賀比至客省幕次對
立皆如入見儀至收笏坐先湯次酒三盞畢客省傳示來
使辭日請都管上中節當面勸酒回傳示畢引都管上中
節於幕次前階下排立先揖飲酒再揖引退至三盞酒畢
茶罷出笏近前齊請出幕次前外爲上對立通揖分位各
歸幕次候閣門招引時請客省與使副幕次前外爲上對
立揖對行至門外階下與引揖閣副揖引使副左入與臣
僚合班至丹墀北嚮立定同臣僚先再拜平身措笏鞠躬

三舞蹈跪左膝三叩頭出笏就拜興再拜平立俟進酒致辭畢再拜宣徽使稱有制又再拜宣答畢先再拜舞蹈平立分班俟皇帝舉酒時再拜合班又再拜上殿夏使副在御座右第二行北端立次引都管上中節左入至丹墀立下節門外階下排立齊鞠躬通名畢先再拜鞠躬不出班奏聖躬萬福喝拜又再拜下節聲喏呼萬歲如前儀喝各祇候畢平立再鞠躬喝賜酒食聲喏再拜呼萬歲如前儀引左廊立待床入進酒皇帝飲酒時上下侍立皆再拜俟進酒官至位合坐官再拜皆坐即行臣使酒普傳宣立飲再拜復坐次人從鞠躬聲喏再拜呼萬歲之儀如前皆坐

至第三盞傳宣立飲畢再拜復坐次人從如前畢坐俟致語聞鼓笛時揖臣使皆立俟口號絕臣使再拜坐次人從如前儀復坐次至五盞將曲終人從立再如前儀畢先引出臣使起再拜退至丹墀合班謝宴再拜舞蹈三拜喝各祇候引出至三門階下與閣門副使相揖別與客省同行至幕次前對立先揖各傳示再揖請分位就幕次少頃請館伴與使副出幕次外為上對立先揖各傳示再揖引行至亢下馬處請左右易位對立揖收笏上馬至館聲喏相揖分位與初入見還禮同第六日賜分食并賜酒果禮天使至館與第二日賜酒果禮同是日支押分食酒果軍士

物并在館隨局分官負承應人例物凡裏外門將軍監厨
直長館都監監酒食官承應班祇候衆厨子館子巡護軍
館伴所牽攏官皆溥及之第七日曲宴禮如前儀第八日
奉辭之儀至小起居畢閣使先奏來使辭膀子引使者左
入傍折通班至丹墀再拜不出班奏聖躬萬福又再拜揖
副鞠躬使出班戀闕致詞復位再拜喝各好去引右出次
引宰執下殿禮畢第九日聚廳送至恩華館更衣而行凡
使將至界報至則差接伴使至則差館伴使去則差送伴
使皆有副皆差書表以從凡行省來宴回宴之押宴官皆
從行省定差就借以文武高爵長官之職以爲轉銜之光

來回之賜宴天使皆以閣門祇候往詔書口宣比且稟命於
都省以翰林院定撰焉夏使至或許貿易於市二日使至
所差者館伴使副各一監察奉職省令史各一書表四總
領提控官酒食官監厨稱肉官各一牽攏官三十尚食局
直長知書都管接手湯藥直長長行各一厨子五奉飲直
長一長行二奉珍二儀鸞直長一長行十把內外門官二
館外巡防軍三十把館甲軍六十二雜役軍六十過位不
通漢語軍十凡雜役皆衣皂過食司吏八十街市厨子四
十方脉雜科醫各一醫獸一鞍馬二十四疋後止備八疋
押馬官一負又差說儀承受禮直官一負凡在館鋪陳繳

絡器四什物戶部差官與東上直閣同點檢所經橋道皆
先期命工部修治之凡賜衣使副各三對人從衣各二對
使副幣帛百四十段舊又賜貂裘二無則使者代以銀三
錠副代以帛六十疋後削之惟生餼則代以綾羅三十九
疋帛六十二疋布四疋金帶三金鍍銀束帶三金塗銀開
裝鞍轡三金塗銀渾果一匣間金塗銀裝釘黑油詔匣及
包書詔匣複各一朝辭賜人從銀二百三十五兩絹二百
三十五疋賜宋高麗使之物其數則無所考

志第十九

